



16. august 2016

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

**Angajoqqaanngortut sivilunerusumik sulinngiffeqartalernissaannut tunngasumik Naalakkersuisunut apeqqut:**

**1. Naalakkersuisut maannakkumut meerartaarnermi sulinngiffigineqartartut anaanaasumut (sap. Ak. 15-nit), ataataasumut (sap. Ak. 3-nit) aammalu angajoqqaanngortunut sulinngiffeqarfii (sap. Ak. 17-nit avitassat) qanoq isumaqarfigaat?**

**2. Qanoq aningaasartuutit isikkoqassappat angajoqqaanngortunut sulinngiffigititaq sivitsorniaaraanni? Uani Skema atorlugu takussutissiannorlugu piumaneqarpoq, angajoqqaanngortut sulinngiffeqarfii qanoq akeqassanersut sapaatit akunnerinut ukunanut sivilussusilerniaaraanni: 1, 2, 3, 4, 5, 6, 7, 8, 9, 10, 11, 12, 13 aammalu 14-nut.**

**3. Naalakkersuisut pineqartumut allanik paasissutissiisinnaanerlutik?**

(Inatsisartunut ilaasortaq Poul Hansen, Demokraatit)

**Tunngavilersuut:**

Pingaaruteqarpoq ilaqutariinneq aallartinneriniit pitsaasunik sinaakkusersuinissarput inunngortoq angajoqqaajusullu pitsaanerpaamik najorsinnaatikkumallugit. Taamaattumik pingaaruteqarpoq angajoqqaajusut sulinngiffeqarallarlutik meerartik najornissaannut periarfissaqarluarnissaat.

Maannakkumut sulinngiffeqarallarnermut inatsisit imaapput:

Arnaq meerartaareernerup kingorna sapaatit akunneri 15-nit sulinngiffeqarallarnissaminut pisinnaatitaavoq. Ulloq meerartaarfimmiit sapaatit akunneri 15-niusut sulinngiffeqarallarfissat aallartittarput.

Ataataasoq meerartaareernerup kingorna sapaatit akunneri 15-niusut iluanni sapaatit akunneri pingasut sulinngiffeqarallarnissaminut pisinnaatitaavoq.

Taamatuttaarlu sapaatit akunneri 15-nit qaangiuppata angajoqqaajusut sapaatit akunneri 17-niusut periarfissaqarput agguarlugit sulinngiffeqarallarnissaminut.

Allatut oqaatigalugu angajoqqaajusutsulinngiffeqarallarlutik meerartik inunngorneraniit ilaginissaanut tamakkiisumik sapaatit akunneri 32-vit periarfissaraat.

Sanilliullugu angajoqqaat Qallunaat Nunaanni najugaqartut pisinnaatitaaffii ima isikkoqarput:

Anaanaasoq meerartaareernerup kingorna sapaatit akunneri 14-nit, ataataasumullu meerartaareernerup kingorna sapaatit akunneri 15-nit ingerlanerini sapaatit akunneri marluk sulinngiffeqarallarnissartik pisinnaatitaaffigaat, taamaasillutillu angajoqqaajusut sulinngiffeqarallarfiiit sapaatit akunneri 32-iusut iluminni agguataarsinnaallutigit.



Isumaqarpoq angajoqqaat Qallunaat Nunaanni najugallit meerartaareernerup kingorna katillguti sapaatit akunneri 46-ut sulingiffeqarallarnissamut pisinnaatitaapput.

Paasinarpoq Qallunaat Nunaanni pissutsit tamarmik assigalugit ingerlasinnaanngitsugut, kisiannili uani assigiinnngissuseq annertooq eqqartorneqarpoq. Tamanna tunngavigalugu paaserusunnarpoq inuiannut qanoq akeqassanersoq Qallunaat Nunaanni angajoqqaajusunut sulingiffeqarallarnissamut pisinnaatitaaffiit qanillattorniaraanni.

Akissut ullut qulit suliffiusut iluanni akineqareernissaa kissaatigineqarpoq.